



## KOMUNIKADO DI PRENSA 2016-002

*Presidente di Banko Sentral ta urgi pa medidanan struktural*

### “No ta duna e atenshon nesesario”

**WILLEMSTAD/PHILLIPSBURG** – Presidente di Banko Sentral di Kòrsou i Sint Maarten, Dr. Emsley Tromp, a bisa ku apesar di e kaida konsiderabel di preis internashonal di krudo ku a resultá den un bahada di inflashon, kresementu ekonómiko na Kòrsou i Sint Maarten ainda ta moderá. Partikularmente, e efektonan ku bahada di inflashon tin riba demanda privá ta parse limitá. “Ámbos ekonomia no a realisá un kresementu mas fuerte dor ku e maneho di e gobièrnunan no a duna suficiente atenshon na e implementashon di medidanan struktural pa mehorá nos klima di invershon,” Tromp a bisa den e Informe di Kuartal di Banko Sentral pa e di tres kuartal di 2015.

“Pa e motibu ei, ámbos pais mester inkluí den nan maneho medidanan pa hasi nan ekonomia mas kompetitivo riba término medio i largu. Pa realisá esaki mester enfoká mas riba medidanan pa mehorá e sistema di enseñansa, redusí e diskrepansha entre demanda i oferta pa loke ta trata e abilidadnan i konosementu disponibel riba merkado laboral, i oumentá nos produktividat,” Tromp a urgi. “Presupuesto di gobièrnu tambe mester reflehá e medidanan aki. Aktualmente ta parse ku e enfoke prinsipal di e presupuesto di gobièrnu ta pa kumpli solamente ku e kondishonnan di supervishon finansiero. Pues, mester eksplorá opshonnan pa inkluí den e presupuesto maneho ku ta enfoká riba kresementu di nos ekonomia i alabés mantené e presupuesto balansá.”

“Den kaso di Sint Maarten, un di e lèsnan di mas importante di e último sinku añanan ta ku gobièrnu mester oumentá su entradanan pa su finansas públiko por bira sostenibel. En partikular, oumentá entradanan di impuesto ta imperativo pa Sint Maarten por kubri su gastunan. Di otro manera, e pais lo keda den un sírkulo visioso di un presupuesto ku no ta balansá i mas pago retrasá,” Dr. Tromp tambe a konkluí.

E teksto integral di e Boletín tokante di e di tres kuartal di 2015 ta disponibel riba e wèpsait di CBCS

<http://www.centralbank.cw/qb-2015-3>

15 yanüari 2016

**CENTRALE BANK VAN CURAÇAO EN SINT MAARTEN**